

Alti A. B. C.-Clique

1900 — 1926



Schnitzelbank

(Vierstimmig)

's letscht Johr het der Blaugryz-Hasler
Y-gäh an der Grossi Rot:
D'Fasnacht soll me glatt verbiete!
(Wohrschynts, will bi ihm nyt goht — —)

Doch in Sache Nare-Zumpft
Isch der Grossrot selber kranggl!
Und so stehn mer wieder vor-ich
Mit eme scheene Schnitzelbank!

Wenn Ein' hitt zue'r Inspektion muss gofi,
Het er nyt z'lache! 's isch e Schand!
Er wird g'strieglet wie-n-e Schuelbueb
Vom neye-n-Oberscht-Lytnant!

Stingeli, dy Ibermuet
Het fir uns'ri Lyt kai Raiz!
Gang du lieber wieder heim-zue —
Uf Luzärn — und b'sorg' dy Baiz!

Unseri Landsgi mache Musig,
Passe-n-uf, und suffe Wy!
Au e Turn-Sektion wird g'rindet,
's erschti Schwingfest soll bald sy!

Und als Schwinger-Kenig zaigt
Sich der alt Brisago-Fritz!
Und 's mien d'fätze umme-lliege —
«Sterne»-Kaib! sunscht het's kai Spitz!

Wenn der Lytnant Bänz ins Badisch will,
Git's fir ihn kai Pass und Zoll!
Er nimmt eifach nur sy Schtägge,
Haut im Zellner der Ranze voll!

Sott das Birschili no-mol ko:
Ziehn'd doch gly der Tierarzt zu!
Machet G'frierflaisch us däm D —
Und denn hämmer alli Rueh!

Was so d'Fraue alles schaffe tien,
Het halt usg'stellt miesse sy!
G'schupfti Gagle vo der G'werbschuel
Stelle do ihre Miggis dry!

Doch, d'Fabrik-Arbeit het g'fählt!
Und au d'Frau, wo butzt und wäscht!
Und au die, wo ihre Bolle
Sich verdiene tien im Näscht!

Syt der Hundebann isch umme,
Ka me d'Mulkerb billig ha!
Drum sin g'scheit und leget jedem
Dumme Wäschwyb eine-n-a!

Do gieng gwiss der Stahldroht us,
Und 's gäb bald kai Leder meh',
Wenn me e jedi beesi Schnure
Mit e-me Mulkorb wott verseh!

D'Militärler hän e-Dänggmol g'setzt
Obe-n-uf der scheenè Batterie!
Fidleblutt drei strammi Kärli!
's haisst, das soll e Kunscht-G'nuss sy!

Mängge Baggfisch stoht dervor
Und wird rot, und schluggt und druggt!
Und 's hett mängere-n-alte Schachtle
Bi däm Abligg naim g'juggt!

Wenn der Basler Gross-Rot Sitzig het,
Do wird's jedesmol fideelt!
Der Doggder Ronus schänkt der Schnytzge
E Schnure voll Rizinus-Oel!

Gänd im Staat e Noch-Kredit,
Z'kaufe vo däm Oel en-gros!
Dass die ganzi Schwäfelbandi
'mol der Sch tät biko!